

■ DATALAND

# Grischuns èn buns signuns virtuals, ma per quai gnanca gieva quai

**(rtr) Durant tschintg dis èn vegnidas fabritgadas magnuccas en las chascharias virtualas dal giu «CheeseMaster». I valeva da batter il computer cun l'agid d'aspectaturas da l'emissiun <data>land. Ma quai è mo stà ina finta: I gieva per rimnar tut las datas dals giugadurs.** Il giu electronic «CheeseMaster» propagà per ina saira da la SRG SSR ha rimnà in pèr milli giugaders en sias chascharias virtualas en tut la Svizra. Tuts han etichettà, taglià e controllà magnuccas a mordio. Ed uschia han las giugadras ed ils giugaders laschà enavos ina massa datas.

### Dapli datas che quai ch'ins pensa...

Avevass sminà ch'il meglier giugader en territori rumantsch ha dà cun in browser endrizzà tudestg ed ha dà durant tut il temp da l'emissiun dataland il giu? Ed avevass patratgà ch'ils megliers giugaders da las quatter regiuns linguisticas han dà cun apparats mobils (2 iPhones, 1 iPad, 1 android)? Ed avevass patratgà che nagin da quels giugaders (nus stuain crair ch'igl'èn umens [guarda l'ultim paragraf da quest artitgel]) – avevass patratgà che nagin da quels giugaders ha guardà tras las cundiziuns generalas da fatschenta? Las chascharias virtualas grischunas han fabritgà da quai da 250'401 chascholas en media per giugader/giugadra e tut en tut 54'086'534. Ils megliers signuns artificialis en Svizra èn stads ils vischins da la Turgovia cun 387,469 magnuccas in tras l'auter per giugadra u giugader.

Era durant il temp da trenament sa chattava il Grischun adina tranter las emprimas trais posiziuns grazia oravant tut a dus giugaders extraordinaris ch'han produci passà il dubel da la quantitat

da magnuccas dals megliers giugaders en ils auters chantuns.

Il «CheeseMaster» n'è però betg vegnì sviluppà per chattar ora tge chantun che fa ils megliers clics. Il giu è anzi vegnì sviluppà per musar quantas datas ch'ins lascha enavos er en in'applicaziun simpla ed innocenta sco in giu.

### Èn ils sanestrers megliers ch'ils dretgers?

Durant il giu ha la maschina per exempel chattà ora sch'ina giugadra/in giugader è sanestrer u dretger. Quai è vegnì fatg cun analizar sin tge direcziun las magnuccas èn vegnidas tagliadas en il giu da purziunar. Sche la gronda part da las magnuccas è vegnida tagliada da sisum sanester a giusut dretg, lura è quai in ferm indizi ch'i sa tracta d'ina persuna ch'è dretgera. Tenor quell'analisi èn da quels ch'han giugà 18% sanestrers – quai per tut la Svizra. Ils pli blers sanestrers dettia quai dal reminent tranter ils Rumantschs (19%). Ils pli paucs tranter ils Italo-fons (17%). Ed èn ils sanestrers uss megliers en il giu ch'ils dretgers? Tenor analisa da la partiziun vallesana da la Scola auta spezialisada da la Svizra occidentala HES-SO a Sierre, tut simplamain: Gea. La HES-SO a Sierre è stada responsabla da rimnar ed analizar las datas dal «CheeseMaster». Il giu da la SRG SSR è dal reminent vegnì sviluppà ensem cun la Scola auta spezialisada e l'interpresa DNA Studios a Bulle.

### E quants tschorvs per colurs han giugà?

Ord las datas è era resultà ch'i dettia tranter tut ca. 16'000 giugadras/tut ils giugaders 305 persunas ch'èn omadus: sanestrers e tschorvs per colur. Sch'in giugader è tschorv

per colurs sa mussa en ses resultats dal giu da controlla da qualitat. Tranter auter èsi en quel giu stà da sortir ora magnuccas cun etichettas cotschnas cun inscripziun verda. Tge che l'analisi per la tschorvada per colurs vala è però dispaivaivel. Tenor statisticas uffizialas èn ca. 5% da la populaziun tschorvs per colurs. Tenor l'analisi da las datas dal giu fissan 14% tschorvs per colur; il pli fitg en l'Italo- e Francofonia cun 16%, il pli pauc en la Svizra tudestga cun 13%. Dals Rumantschs èn tenor las datas dal giu 14% tschorvs per colurs.

### Quels da Cuir era il meglier en il GR

Cun 8'195'254 chascholas producidas maina la citad da Cuir il classament en il GR. Quai èn ils 10 lieus tenor numer postal ch'han produci il pli bler chaschiel durant l'emissiun dataland. Berg d'apertut en il Grischun ha quai dà chascharias virtualas. Nua ch'ina chascharia virtuala sa chatta dependa dal posiziunament (automatic u a maun) entaifer il giu.

### Datas stizzadas

Tut las datas persunalas rimnadas dals 16-11 la damaun da las 07.00 fin ils 21-11 a las 21.55 vegnan stizzadas. Curt avant las 23.00 dals 21-11 èn vegnidas stizzadas tut las datas dals servers da la HES-SO a Sierre. Quai cuntrari a quasi tut las autras paginas ch'ils blers Svizzers e las bleras Svizras visitan mintga di. Google, facebook ed era paginas d'interpresa svizras rimnan datas da tut lur visitaders. Sche vus avais in account da g-mail, per exempel, pudais vesair qua, il link avra en ina nova finestra u qua, il link avra en ina nova finestra las datas che Google ha rimnà da vus.

## Magnuccas producidas en media\*

1 Turgovia:	387'469	
2 Sviz:	353'598	
3 Neuschatel:	319'351	
4 Vallais:	319'171	
...		
12 Grischun:	250'401	

\*per giugadra / giugader